

## **Xujun xi tjun kits'ínntu nda postru Pedro**

*B'i ts'ín kikjaniñaha Pedro xuta ninku*

<sup>1</sup> An Pedro, an nda postruhu Jesucristo títs'inkjínuu xujuin jun xi j'áinnuu Ntíaná. Jun xi kindzjoyo ante Ponto nga tinimasún, ko ante Galacia ya, ante Capadocia, ante Asia ko ante Bitinia. <sup>2</sup> Kikie tíjunnuu Ntia Na'miná, kui nga j'ájihinnuu ko Espirituhu kits'ín jenuu, tu xi kuinú'yá'éhen ruu Jesucristo ko tu xi tu ngat'aha jnihi Jesucristo kjuáts'ehenuu Ntíaná.

Kas'e nkjúnnuu kjuanda ko kjuajyu.

*B'i ts'ín tsakúya Pedro ni xi ñá tjeheñá nga kuichú nistjin xi fekuu*

<sup>3</sup> Kan'etsjoho Ntíaná xi Ntiaha ko Na'mihj Nda Ntíaná Jesucristo. Ngat'aha kjuanimatak'un chánkaha kits'intsin tsetse ngáhaná nk'ie nga kits'ínkj'áíya ngáha ra Jesucristo ajihin xutak'ien. Kui nga tichuyáhaná nga kuintsuba tik'aán ko ñá <sup>4</sup> ko nga n'ekjáhiín ni xi tsjáná, ni xi najmi maha batsun ko najmi ma chuntí ko najmi maha 'meya, ni xi tjítjoho ndjiojmi ján ngandanuu. <sup>5</sup> Nga'yúhun Ntíaná tikunkohonuu tu ngat'aha nga s'ejinnuu. At'aha tjíndaha yjoho Ntíaná nga kuakúchji xi nkú ts'ín ts'ínk'anki xuta xi ts'e nistjin xi fekuu.

<sup>6</sup> Kui kjuaha nga kitsejihinnuu kjuatsjo, ndaha tsa chuba nistjin tjihin nga n'e nibánenuu nkjin tikjá ni xi kuitjájiun. <sup>7</sup> Kui xi kuakúchji yáha jun

nga kjuaxi. At'aha nga s'ejinnuu, kui xi 'yún chji saha ra nga toonsinee. Ndaha tsa maha batsun toonsinee, tunga chasehé ra tu xi s'ejña chjihi tsa kui kjuaxi. Ko nk'ie nga s'ejña chji xi nkú ts'ín s'ejin kjuaxinnuu, nda ts'ín chubayanénuu ko sakúnuu kjuachánka ko nda k'úinnuu nistjin nga kj'uaíkáchji yjoho Jesucristo.

<sup>8</sup> Tjonuu Jesucristo, ndaha tsa najmi yo nkú tjín. Ko ndaha tsa najmi tíyo nd'aj, tunga s'ejhínnuu ko tjínnuu kjuatsjo xi tjíhin kjuachánka, xi najmi yaá xi nkú ts'ín bixíyaá. <sup>9</sup> Tjinnuu kui nii at'aha tísakúnuu nga tín'ek'ankinnuu, kui xi nibáha ra ngat'aha nga s'ejinnuu.

<sup>10</sup> Já profeta xi kis'e nistjin nk'ie, xi kitsúya tíjún kjuanda xi sakúnuu, kui xi kits'ínnkink'un nga kama chubayahá xi nkú ts'ín k'uankihi xuta, at'aha mjehe skue kui nii. <sup>11</sup> Kama mjehe nga incha skue yá xutaha ko mí nistjihin xi y'ejña chji Espirituhu Cristo xi y'ejñajihin já profeta nga kitsúya tíjuhún kjua'un xi tjíhin nga skue Cristo ko nga askahan s'e kjuachánka. <sup>12</sup> Tunga Ntíanáhá tsakúchjihí já profeta xu'bo nga ni xi tíincha tsuya najmi kui kamats'e, nga ní ngandanuu b'a kitsúhu. Kui niu xi ta kitsúyanuu já xi y'énijmínuu én nda tsuhu Jesucristo. Nga'yúhún Espiritu xi kin'e nibáha ndjiojmi ján y'énijmíhinuu. Ko ta ntítsjee mje nkjúhún nga skue nkú tjíhin ra ni xu'bj.

*B'i ts'ín tsakúya Pedro nga tintsuba ndaá at'aha Ntíaná ja ts'ená*

<sup>13</sup> Kui b'a maha, chase sisihin ruu xi nkú n'oo. Nda n'enkjintak'un ko chúya k'un'uhúun kjuanda xi kj'uaítsjánuu Jesucristo nistjin nga kuakúchji

yjohō. <sup>14</sup> B'a n'oo xi nkú ts'ín ntí xi nt'é'én. Najmi ta n'ehenu xi nkú ts'ín kinchja animanuu nistjin nk'ie, nk'ie nga najmi kjee yo Ntíaná. <sup>15</sup> Tsje katumo nginkun Ntíaná, xi nkú ts'ín tsje xi j'ájinnuu. <sup>16</sup> At'aha b'i ts'ín tjit'a éhen Ntíaná: “Tsje katumo, at'aha tsjená.”

<sup>17</sup> Xihí “Na'mihí” bixíhuun xi ngúsuhún basehe tsa nda kō tsa najmi nda ni xi ts'ín nga nkúnkú xuta, kui nga kas'enuu kjuabinkjuhun xi nkú ts'ín kuankinkoo yjonuu nk'ie nga tinimasún so ej asuntee. <sup>18</sup> Yo nga kis'echjintjainuu tu xi kama ndáihinuu nga chuba tintsubanú. B'a ts'ín tintsuboo nk'ie at'aha kui nihi xi y'éjñanuu ntje chánuu. Najmi toonsine kō tsa toontaba kin'echjén nga kis'echjintjainuu, ni xi maha batsun. <sup>19</sup> Jníhí ní Cristo kin'echjén, kui xi 'yún chjí. Xi nkúhu nku chutsanká kama Cristo, chutsanká xi najmi chumi nihi xi k'uhun kō xi najmi uhun.

<sup>20</sup> Kintehe ni nga kamanda asuntee kis'enda titjun ni xi ts'ín Cristo, kō nistjin feku xi kich'aá nd'ai j'aikúchji yjohō ngandanuu. <sup>21</sup> Ngat'aha Cristo s'ejihinnuu Ntíaná, kui xi kits'ínkj'áiya ngáha rá Cristo ngabayoo kō kitsjáha kjuachánka. Kui nga tín'e s'ejihinnu kō tíma 'yún tak'uhunnu Ntíaná.

<sup>22</sup> Nd'ai ni nga ja kamaje animanuu at'aha kinu'yá'óhōon én xi naxu tjin kō nga tu xí ndahá ts'ín tjíyanuu nga n'etjō xuta ninku, kui nga ngayjee animanuu n'etjōhonu xinkiu. <sup>23</sup> At'aha ja kitsin tsetse ngáhanu. Najmi kitsiun xi nkú ts'ín tsin xuta xi maha 'me. Éhen ní Ntíaná kits'ínsin tsetse ngáhanuu. Kui xi fi ndju. Najmi kamaha kfe.

24 At'aha b'i ts'ín tjit'a xujun éhen Ntíaná:  
 Ngayjee xuta, xi nkú joyaha jñá xi tjin.  
 Kō ngayjee kjuachánkaha xuta,  
 xi nkú joyaha naxúhu jñóo.  
 Xi jñóo kō jne naxúu,  
 25 tunga éhen Ntíaná santaha tu nkjéhé ni ngjuai  
 ndju.  
 Kui éen, kui én nda tsu xi ja kis'enijmí ajinnuu.

## 2

1 Kui b'a maha, n'e t'axíhinu ngayje  
 kjuach'onk'un, ngayje ni tsank'á, kjuajohonkin,  
 kjuaxintak'un kō ngayje tíkjá kjuachubatit'ain.  
 2 Katumo xi nkú joyaha ntínta xi mje nkjühun  
 ntáchiki. B'a ts'ín katuma mjenuu én xi ndoo. Kui  
 xi tsjá nga'yúhun kjuankjintak'unnuu, tu xi b'a  
 ts'ín saáhanu santaha nkúhu nga kjuáts'e sínnuu  
 Ntíaná. 3 Xihí jahá kichjut'o ngandaha Nda Ntíaná.

*B'i ts'ín tsakúya Pedro nga nku ndjio k'aku kits'ín  
 ma Jesucristo nga y'éjña chubaya*

4 Nibák'un tiñohoo Nda Ntíaná, kui xi nkú joyaha  
 nku ndjio xi tíjña tík'un. Kikjaníya xuta ndjio xu'bo,  
 tunga Ntíanáhá j'ájin ndjio kō nginkun Ntíaná 'yún  
 chjihí ra. 5 Jun xi nkú joyaha ndjio xi tjíntu tík'un, xi  
 kin'endakoho nku ninku xi najmi asuntee y'aha  
 ra. Kin'e manuu já na'mi jehe Ntíaná xi tsjáha chje  
 Jesucristo, chje xi nk'a ján tjehe ra. A Ntíanáhá  
 tí'bohóo kui chje nga b'a t'n'o, kui chje xi sasihin  
 Ntíaná.

6 At'aha b'i ts'ín tjit'a xujun éhen Ntíaná:  
 An k'uejñá nanki Sion nku ndjio k'aku,  
 xi j'ajián kō xi 'yún chjí.

Ndahachí najmi sakúhu kjuasuba  
xuta xi s'ejihin ndjio.

<sup>7</sup> Ngat'a ts'ajun xi s'ejinnuu Nda Ntíaná, chjihí ra  
kui ndjio. Tunga xi najmi s'ejihin, bitjusun má nga  
b'i ts'ín tjit'a xujun éhen Ntíaná:

Ndjio xi kikjaníya já chjinexjóo,  
kui xi ja j'ai ma ndjio k'aku.

<sup>8</sup> Kó b'i tá títu ya:

Tsichu ma nku ndjio xi ts'ín saténki xuta,  
nku naxi xi ts'ínxuntuu.

Saténki xuta xu'bo ngat'aha éen, at'aha najmi  
nt'é'éhen éen. B'a maha xuta xu'bo at'aha ja b'a  
ts'ín tijná nga b'a kamaha.

<sup>9</sup> Tunga máha jun, jun xi xuta xi kichj'ajin, jun  
já na'mi xi ts'ínxát'aha xi batéxumaha nk'a ján,  
tsjenú jun xi xuta naxinantáha Ntíaná, xuta xi  
ja tsichu ma ts'e Ntíaná. B'a kin'e manuu tu xi  
kuixinyahanu xi nkú ts'ín chánka xi j'ájinuu. At'aha  
Ntíaná j'ájinuu nga kuitjujiun má jyuun kó nga  
kuitjás'enjiun má nga ts'ín ndzjen kjuachánkaha.

<sup>10</sup> Nistjin nk'ie, najmi xuta naxinantá kik'innuu,  
tunga nd'ai ja tsichumo xuta naxinantáha Ntíaná.  
Kó nistjin nk'ie najmi kichase nimanuu, tunga  
nd'ai ja tichase nimanuu.

*B'i ts'ín tsakúya Pedro xi nkú ts'ín tjihin nga  
kuankíkaá yjoná ajihin xuta xi tjin asuntei*

<sup>11</sup> Tjona jun, já nts'e. Tibankinuu nga t'ech'óho  
yjonuu xi nkú ts'ín mjehe animanuu. At'aha kui  
nij, kui xi tífi kontranuu. Yo nga xin nankinuu  
kó tu tínimasúnnú ei asuntei. <sup>12</sup> Tu nku kixihí  
tankinkoo yjonuu ajihin xuta xi najmi be Ntíaná.  
B'a n'oo ndaha tsa b'a incha kuitsu nga najmi

nda t́ín'o. Tunga incha skuehé ni nda xi n'oo ko ts'íintsjohó Ntíaná nistjin nga kuanki kuenta.

<sup>13</sup> Ngat'ahá nga Nda Ntíaná ts'enúu, kui nga chankjúhunnu ngayjee já xi t́jihin xá ei asunntej. B'a n'oo nginkun nda títjun k'aku Roma <sup>14</sup> ko b'a n'oo nginkun já k'aku xi b'éxá nda títjun k'aku nga ts'ínnijéhe xi ch'on ts'ín ko nga kjanínk'a xi nda ts'ín. <sup>15</sup> At'ahá mjehe Ntíaná nga n'oo ni xi nda. B'a ts'ín k'úechjahanu ts'a xuta xi najmi be Ntíaná ko najmi mankjihin ni xi ts'e.

<sup>16</sup> Ndaínúu yjonuu nginkun Ntíaná, tunga najmi tu n'echjénnú kjuandaínúu tsa k'uaintohoo yjonuu nga n'oo ni xi najmi nda. Tu sa ní tintsuboo xi nkú ts'ín b'entu xuta xi ts'ínxát'ahá Ntíaná. <sup>17</sup> Chankjún ngayjee xuta. N'etjó xi ta Ntíhi Ntíaná. Chankjún Ntíaná. Nuú'yá'óhóon nda títjun k'aku Roma.

*B'i ts'ín títuya Pedro ni xi t́jihin nga ts'ín xuta musu xi kich'atse*

<sup>18</sup> Jun xuta musu xi kich'atsenuu, chankjún já ntíanuu ko nuú'yá'óhóon, najmi tu suba xi nda t́jyahá ko xi ma nimahá jun xi b'a n'ekoo. B'a ní ta n'ekoo xi kjan ts'ínkonuu. <sup>19</sup> At'ahá nda nginkun Ntíaná nga ts'ín chúkjuá jámusu kjuá'un xi tíf'ajin, ndaha tsa najmi t́jihin nga kj'ujin niu kai, tunga ts'ín chúkjuahá at'ahá ja kitsjáha yjohó Ntíaná. <sup>20</sup> Tunga tsa ch'on t́ín'o ko tsa as'ai tít'sín'unnuu já ntíanuu ko t́ín'echjúkjuo, ¿mí ni chánkaha xi t́ín'o ma? Tunga tsa nda t́ín'o ko as'ai t́ín'e chúkjuo kjuá'un xi t́ibitjájún, kuihí ni xu'bj xi nda nginkun Ntíaná.

<sup>21</sup> J'ájinuu Ntíaná nga n'oo ni xi nda ko nga n'e chúkjuo ni xi tu kjuandahá kuitjájün, xi nkú ta

kits'ín Cristo nga un kíkíehē ngandanuu. Y'éjña chubayanuu, tū xi b'a tā n'ehenu. <sup>22</sup> Najmi kits'ín ngatitsun kō najmi kik'anacha. <sup>23</sup> Nk'ie nga ch'on kik'ihin, najmi ch'on ts'ín kits'ínk'óya. Nk'ie nga un kíkíehē, najmi b'a kitsú nga k'uasje chjí ni xi t'ín'ehe. Tū sa ní aya ntsja Ntíaná y'éjñaya yjohō, at'aha kui xi kixi ts'ín kjuā.

<sup>24</sup> Kui kikjin kik'anji ngatitsunná nga kis'et'a kruu. B'a kits'ín tū xi kuayáha raá ngatitsuun kō naxu n'eé nga kuintsubaá. Kō tū ngat'aha nga kin'e'uhun Cristo, kui nga kin'enkihinu. <sup>25</sup> Nístjin nk'ie xi nkú joyaha chutsanka xi ngji t'axín kamo, tunga nd'ai ja kik'óyak'un ngáhanu Nda bastuu, kui xi kunnuu.

### 3

*B'i ts'ín títsuya Pedro xi nkú ts'ín tjihin nga k'úéntukō xinkjín xuta*

<sup>1</sup> Kō jun xi tí'minuu jminchjín, chankjún x'innuu. B'a ts'ín ni xi n'ehenu ts'íihin nga s'ejihin Ntíaná x'innuu. Najmi ni xi chūbo ts'ín nga s'ejihin x'innuu. <sup>2</sup> Skue xi nkú ts'ín naxu tibankinkōo yjonuu kō nga tīyankjún Ntíaná.

<sup>3</sup> Najmi tū tsjo n'ek'íésunk'o yjonuu, tsa nihi xi nkjún ts'ín k'úendo ntsjanuu kō tsa nihi xi nkjún ts'ín ngjúát'o tōonsine kō tsa najyun xi 'yún chjí ndyjoō. <sup>4</sup> Tū sa ní ajin animanuu kas'e kjuatsjotjín xi najmi mahā feya, kui xi tsuhū rā nga nda kas'eyanuu kō najmi stinta. Kui ni xu'bjí xi 'yún chjīhī rā nginkun Ntíaná.

<sup>5</sup> Nístjin nk'ie b'a ts'ín y'énda yjohō jminchjín je xi kis'e. Kui xi kama 'yún tak'un Ntíaná kō

incha kikienkjún x'ihin. <sup>6</sup> Xi nkúhu Sara, kui xi kint'é'éhen Abraham ko “Chá Ntiana” kitsúhu. Tsa ni xi nda n'ehenu ko najmi kuinkjún ni xi kamat'on, jun xi ntíhí Sara b'a.

<sup>7</sup> Ko jun xi tí'minuu jáx'in, n'enkjínk'un sisiun xi nkú ts'in kuintsubakoo chjuúnnuu. Chanjún at'aha najmi ndjá tjíyaha xi nkúhu jun, ko at'aha jun ko kui ta ñja n'ekjáínkohoo kjuandaha Ntiana nga kuintsuba tík'un. B'a ts'in tintsubakoo tu xi najmi chumi nihi xi k'uéchjaha ra nga chubakoo Ntiana.

*B'i ts'in tsakúya Pedro xi nkú ts'in tjihin nga kuintsubaá*

<sup>8</sup> Ko ni xi fekuhu, nda ts'in tintsubakoo xinkiu. B'i ngján chase nimohoo ko n'etjío xinkiu at'aha nts'o mahanu. N'e'yún tak'un xinkiu ko nimakjua katumo. <sup>9</sup> Najmi tu n'es'echjiú tsa ch'on tín'enuu ko najmi tu én ch'on tsu n'ek'óyo tsa ch'on tí'minuu. Tu sa ní chubantjó nginkun Ntiana xi nkú títs'innuu, at'aha tu xi nda ts'ínkohonu Ntiana, kui nga kichj'ajihinnuu.

<sup>10</sup> At'aha b'i títsu xujun éhen Ntiana:

Xi mjehe ts'íntjo nistjin xi y'a,  
ko mjehe nga tsjo ts'in kj'uaaha nistjin,  
kui xi kat'éch'ohoo njai én ch'on tsu,  
ko najmi tu katitju ts'a én tsank'á.

<sup>11</sup> Kats'in t'axihin yjohoo kjuach'onk'uun,  
ko kats'in ni xi nda.

Katangisjai kjuajyu ko kat'ejñajin.

<sup>12</sup> At'aha Ntiana basehe xuta xi naxu ts'in,  
ko nda basínñjuhu ni xi 'mihí nga chubako,  
tunga fi kontrahá ra xi ch'on ts'in.



*B'í ts'ín tsakúya Pedro xi nkú ts'ín s'eyaná tsa kjuanima kuitjáián*

<sup>13</sup> ¿Yá xi ch'on ts'ínnu tsa ngayjehe k'un n'oo ni xi nda? <sup>14</sup> ¡Á b'a nda tjíhin ts'ajun tsa nk'ie nga tín'o ni xi naxu tjín títbitjáiún kjuanima! Najmi tu binkjun xuta ko najmi tu nkjún manuu. <sup>15</sup> Tu sa ní chankjún Cristo ajin animanuu, at'aha kui xi Nda Ntíanuu maha. Ko tintsuba ndo nga kamanuu k'úinyohoo xi ngjuásjaiyanuu ngat'a ts'e kjuanda xi tichuyóhoo.

<sup>16</sup> Tunga nimakjuahá n'esjo yjonuu ko chankjún jóo nga b'a n'oo. Najmi tu chumi ni chuba n'ek'anjiu yjonuu, tu xi nk'ie nga chubayanéhenuu kjuasuba kasakúhu ra xi tinchjatit'ainnuu ngat'aha xi nkú ts'ín naxu títbankínkoo yjonuu nga yjankiu Cristo. <sup>17</sup> Tsa ni xi kjuanima títbitjáiínnu, b'a katuma tsa Ntíaná b'a ts'ín mjehe. Tunga ngat'aha ní nga nda tín'o b'a katumanuu, najmi ngat'aha nga ch'on tín'o.

<sup>18</sup> At'aha kui nihi xi ta j'ajin Cristo. Nkuhú n'iyá k'ien tu xi kits'ínndyajnuhu ngatitsuhun xuta. Xi naxu nginkun Ntíaná un kíkíehé ngandaha xi najmi naxu nginkun Ntíaná. B'a kamaha tu xi ngjikhoná nginkun Ntíaná. Kui xi ngat'a ts'e yjonintehe kin'ek'ien tunga ngat'a ts'ehé espirituhu kin'ekj'áiyaha. <sup>19</sup> Ko espiritú nk'ie nga ngjik'iénimíhi xi ja k'ien xi kjintuyá'yún, <sup>20</sup> xi najmi kint'é'én nistjin nga y'ejña Noe nk'ie, kui nistjiun nga tsakúchji kjuatsentaha Ntíaná nga kikuyá tsa ngjuaikj'áha ra animaha xuta nk'ie nga tít'ínnda tsutsu chánkoo Noe. Jin mahá xuta xi

kits'ínk'ankihí ntóo nk'ie nga incha jas'en tsutsu chánkoo.

<sup>21</sup> Ntóo y'éjña chji títjun xi nkú ts'ín kits'ínk'ankinuu ntánijuo nk'ie nga saténtáá. Tunga nk'ie nga saténtána, n'ek'ankiná at'aha j'áiyaha Jesucristo ngabayoo. Najmi saténtáá tsa tu xi chjuxíhin kjuachuntíhi yjonintená. B'a ní n'ená tu xi tbinchisjáíhiná nga je s'eyahaná nginkun Ntíaná. <sup>22</sup> Ngjinji Jesucristo nk'a ján ko tijnat'aha Ntíaná. Nt'é'éhen ntítsjee, xi tjin yaha xá ko xi batéxuma.

## 4

### *B'i ts'ín títuya Pedro ni xi k'úéch'ohó yjoná*

<sup>1</sup> Tu ngat'aha nga un kiekehe Cristo nga kik'a yjoninnte, kui nga tjehe ruu yjonuu nga ta kui niu xi kjuajin. At'aha xuta xi ja j'ajin kjuanima, kui xi ja y'éjña ngatitsuun. <sup>2</sup> B'a incha kits'ín tu xi nistjin xi k'ua saha najmi ta k'úéntuhu xi nkú ts'ín nchjaha animaha. K'úentu ní xi nkú ts'ín mjehe Ntíaná. <sup>3</sup> Ja j'a xi nkú n'e tintsuboo nistjin nk'ie, nk'ie nga kin'o ni xi tsjoho xuta xi najmi be Ntíaná, ko kik'aintohoo yjonuu nga kin'o tu mí níhi ni, ko kin'o ni xi nchjaha animanuu, ko kama ch'iu, ko kik'ohoo kjuatsjo animanuu, ko tu nku kjuatsjohó kama mjenuu, ko kiyankjún ntia ch'onk'un xi ts'inná xuta.

<sup>4</sup> Xuta xu'bo najmi mankjihin á najmi ta n'ekohonu ni ch'onk'un xi tu ni xí jahá kits'ínkjas'ehe yjoho. Kui nga nd'ai ch'on ts'ín nchjayanehenuu. <sup>5</sup> Tunga tjihín ni nga ts'ínkjas'en kuenta nginkun Ntíaná. Kui xi ja tjindahá yjoho nga kuasehe mí níhi xi kits'ín nga nkúnkú xi

tj́ntu tík'uun kō xi ja k'ien. <sup>6</sup> Kui kjuaha nga ta kis'enijmíhi ra xi ja k'ien én nda tsuhu Ntíaná, tu xi k'úentu tík'uhun espírituhu xi nkú ts'ín mjehe Ntíaná, ndaha tsa ja kichasehe xi nkú ts'ín y'entu asuntee.

*B'i ts'ín tsakúya Pedro nga nda n'exákaá ni xi kitsjáná Ntíaná*

<sup>7</sup> Ja tábichú tiña nístjin nga n'ekje ngayjee ni xi tjín. Kui nga chase sinsihín ruu ni xi n'oo kō najmi tu n'ekj'áiyō nga chubakoo Ntíaná. <sup>8</sup> 'Yún mjena nga n'etjō xinkiu, at'aha kjuatjoo nkjin nkjún ngatitsun ts'ínndyjajnu. <sup>9</sup> N'ekjōhōon xinkiu ni'yanuu kō tsjo kat'enuu nga b'a n'oo.

<sup>10</sup> Xi nkú nga ts'ín xkí kjuanda xi kin'ekjōhōon nga nkúnkú, b'a ts'ín n'e chjónjihíin xinkiu kui niy. Ngandaha xinkiu katumachjén kjuandoo, at'aha tjíhin nga nda n'e chjón nga nkúnkú kjuandaha Ntíaná xi kin'ekjas'ennuu. <sup>11</sup> Tsa tjín xi kuinchja, én xi títsjáha Ntíaná kui xi kanchja. Tsa tjín xi kuasinko xuta, katasinko xi nkú ts'ín tíjña nga'yún xi títsjáha Ntíaná. B'a ts'ín ajihín ngayjee ni xi n'oo sakúhu ra kjuachánka Ntíaná. B'a kama at'aha Jesucristo yjankiu. Kui xi kas'ehe kjuachánka kō nga'yún santaha tu nkjéhé ni. B'a katuma.

*B'i ts'ín tsakúya Pedro xi nkú ts'ín ndjá kuinchajían ni xi ts'e Ntíaná*

<sup>12</sup> Tjona jun, já nts'e. Najmi tu katuma nkjúnnyu ni xi tímat'on nga ndjá tíchjut'ayák'unnyu, tsa b'a kamanuu tsa ni xi kj'aí kui nij. <sup>13</sup> Tu sa ní tsjo kat'enuu nga tísakút'anuu kjua'un, kjua'un xi ta j'ajin Cristo, tu xi 'yún tse katumaha kjuatsjonuu nístjin nga kama chji kjuachánkaha Cristo. <sup>14</sup> Tsa

ch'on tí'minuu at'aha Cristo yjankiu, já b'a nda tjihin ts'ajun! At'aha Espirituhu Ntjaná tijnajinnuu, Espiritu xi tjihin kjuachánka. <sup>15</sup> Tjin xi un behe at'aha animá ts'ínk'ien, ko tsa ndyjé ts'ín, ko tsa ch'on ts'ín, ko tsa chuba tsungijihin yjoho kjuá xi tjihin kj'ai xutaha, tunga najmi b'ahá katuma ajinnuu. <sup>16</sup> Tunga tsa tjin xi un tíbehe at'aha Cristo kits'ínkjas'ehen yjoho, najmi tu katuma subaha. Tu sa ní kats'intsjoho Ntjaná at'aha Cristo tjenki.

<sup>17</sup> Ja chuba nga kuatuts'ihin ra Ntjaná nga kuasehe mí nihi xi ts'ín xuta. Xuta xi ts'e k'uaha ra. Tsa ná kuatuts'ínkohóná, ¿nkú sa ts'ihin xi najmi tits'ínkjáihin én nda tsuhu Ntjaná? <sup>18</sup> Tsa 'ni b'anki xi naxu ts'ín, ¿yá xi behe nkú k'úé ts'e xi najmi benkjún Ntjaná ko xi tits'ín ngatitsun? <sup>19</sup> Kui b'a maha, xi f'ajihin kjuanimá nk'ie nga Ntjaná titsjante, kats'ínkjas'en animaha aya ntsja xi kits'índaha, kui xi ma 'yún tak'aán, ko tu nkú ndahá kats'ín.

## 5

*B'i ts'ín títsuya Pedro xi nkú ts'ín chasehe xuta ninkuhu Ntjaná*

<sup>1</sup> An xi ndachá ajihin xuta ninku. Tunkán kikiékohona kjuanimaha xi j'ajin Cristo ko ta an xi sakút'ana kjuachánka xi s'ejña chji ndyjun nkiní. Tíbankihí jácháha xuta ninku xi tjin ajinnuu. <sup>2</sup> Chuhun chutsankaha Ntjaná xi kin'ekjas'ennuu. Chasohoo, tunga najmi tu chasehé ruu xi nkúhu tsa kjuá'yún t'n'ehenuu. Ngayje níhi k'un chasohoo xi nkú ts'ín mjehe Ntjaná. Ko ta ndaha tsa toon mjenuu, tsa kui

kjuaha nga chaseru. Chaso níhi at'aha mjenuu nga chasoho xuta ninku.

<sup>3</sup> Najmi tu ndjá n'ekoo xuta xi kin'ekúntanu. Tu sa ní t'ejña chubayohoo xi nkú incha ts'ín xuta ninkuhu Ntíaná. <sup>4</sup> B'a ts'ín nk'ie nga kjuáikúchjhi yjohoo Nda bastu k'aku, n'ekjóhon chjhi kjuachánka xi najmi maha fe.

*B'i ts'ín títuya Pedro mí nihi xi chaséhe nga kuintsubáá*

<sup>5</sup> Ko ta jun xi tí'minu ja xunkú, tibaninu nga chankjún jácháha xuta ninku. Ngatento b'i ngán nímakjua n'esjo yjonuu nginkun xinku, at'aha b'i ts'ín tjít'a:

Ntíaná fi kontraha xi ngak'un,

tunga tsjáhá ra kjuanda xi nímakjua tjíntuyáha.

<sup>6</sup> Kui nga n'e nímakjuahanu yjonuu kinte nga'yún chánkaha Ntíaná, tu xi kui k'uásjenk'ahanuu nk'ie nga kuichú chuba. <sup>7</sup> Ntíaná n'ekjas'ohon ngayjee ni xi kjintahanu, at'aha kui xi kjintaha ra jun.

<sup>8</sup> Chase chubayohoo ni xi n'oo ko tintsuba ndo, at'aha ndanindoo xi nda kontranu maha. Tsú'ba xi nkú joyaha xa xi tób'entsji nga tóbangisjai xuta xi kjine. <sup>9</sup> Tankín kontrohoo ko ndjá tinchajiun nga s'ejinnuu Ntíaná. At'aha yo nga ta kui kju'uhun xi tít'ín chúkjuá ja nts'o xi tjín nga ngúsuhun asunntee.

<sup>10</sup> Nk'ie nga ja un kabenuu chuba nistjin, Ntíaná kikjin, kui xi tsjáná ngayje tákjá kjuanda, kui xi Cristo kits'ínchjén nga j'ájinná nga sakúná kjuachánkaha xi najmi maha feya, ts'ín nga kamo xi tjíhin nga kamo, tsjá nga'yúnnuu, ndjá

ts'íínkinchánūu kō najmi tā tsufi kuínchahanu.

<sup>11</sup> Kui xi tū nkjéhé ni tǵhìn nga'yún. B'a katuma.

*B'i ts'ín kits'ínkje Pedro xujūin*

<sup>12</sup> Silbanō xi nda nts'é xihìn, xi kixi fiko xáha, kui xi tsasinkōna nga kits'inntá xujūin. Chubahá ni xi tǵbet'ánūu nga tǵtsjaniyánūu kō tǵxinya kixinūu nk'ie nga ni xi tǵjít'a ei, kuihí xi kǵjuandaha Ntǵianá. Ndjá tǵinchajiun kǵjuandoo.

<sup>13</sup> Tǵts'ínkjinūu kǵjuasuniña xutá nǵinku xi tǵjín ante Babilonía. Kui xi tā j'ájihìn Ntǵianá xi nkúhu jun. Tā tǵts'ínkjinūu kǵjuasuniña Markō, kui xi ntǵina xihìn.

<sup>14</sup> B'i ngján tsjo n'e súnǵiñohoo xinkiu.

Kas'enūu kǵjuajyu ngatento jun xi tǵntsubajihūun Cristo.

**Éhen Ntíaná**  
**New Testament in Mazatec, Jalapa de Díaz**  
**(MX:maj:Mazatec, Jalapa de Díaz)**

copyright © 2013 Wycliffe Bible Translators, Inc.

Language: Mazatec, Jalapa de Díaz

Translation by: Wycliffe Bible Translators, Inc.

Mazateco, Jalapa de Díaz [maj], Mexico

**Copyright Information**

© 2013, Wycliffe Bible Translators, Inc.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

**The New Testament**

in Mazatec, Jalapa de Díaz

**© 2013, Wycliffe Bible Translators, Inc.**

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-30

---

PDF generated using Haiola and XeLaTeX on 21 Feb 2024 from source files  
dated 29 Jan 2022

e05183c2-7c34-5cdd-8c78-15ea51bd8cbb